



2019-imut aningaasanut inatsisissatut siunnersuut

(Aningaasaqarnermut Naalakkersuisoq)

(Aappassaaneerera)

Demokraatini Aningaasanut Inatsisissatut Siunnersuutip maannakkut isikkua iluarinngilarput. Taamaattumik paatsuugassaannngitsumik erseqqissassavarput pingajussaaneerneqannginnerani naatsorsuutigigatsigu, immikkoortunut assigiinngitsunut allannguutissanik siunnersuuteqartoqassasoq.

Taamatullu naatsorsuuteqarnerput Naalakkersuisut isumagiumaaraat mianersortunnguamik naatsorsuutigaarput.

Siullermeerneranut atatillugu Demokraatini ilaatigut imatut oqarpugut:

- Naalakkersuisut aningaasanut inatsisissatut siunnersuutaat angusaqarluarnissamut tunngavissiiingitsutut isigaarput aamma politikikkut namminiilivikkusunnitsinnut naapertuutinngilaq, angusariaqaratsigumi aningaasarsiornikkut imminut napatinnissaq. Isumarput allanngornikuunngilaq. Naatsorsuutigaarput pingajussaaneerneqannginnerani allannguutissanik siunnersuuteqartoqassasoq pisortat allaffissornerata sipaarfigineqarnissaanut pitsanngorsaavineqarnissanullu imalinnik. Taakku sipaarutit pitsanngorsaanerillu annertussapput pilersitsisinnaassallutillu milliuunerpaalussuarnik. Tamatumap kinguneranik aningaasanut inatsisissap pingajussaaniilerutsigu takusinnaasariaqarparput 2019-mut ukiunullu missingersersuusiorfiusunut milliuunerpassuanik sinneqartooruteqassalluta.

- Politikikkut namminiilivissagutta pisariaqarpoq iluarsartuussinissarput, aningaasanulli siunnersuummi takusinnaavarput Naalakkersuisut 2019 ikaarsaariarfittut atoniarat. Demokraatit isaanni tamanna naammaginangilaq. Naatsorsuutigaarput 2019-mi pingitsoorata iluarsartuussinerit aallartittariaqarlugit. Assersuutigalugu tamanna pisinnaavoq akileraartarnermi akitsuusersuisarnermilu kiisalu inunnik isumaginninnermi. Immikkoortuni taakkunani iluarsartuussisoqarnissaa pisariaqarluinnarpoq.

- Politikikkut namminiilivissagutta pisariaqarpoq inuutissarsiornermik ineriartortitsinissarput. Tassani naatsorsuutigerusupparput, Inatsisartut pingajussaaneerinnginnermi mittarfiliortiternissat akuerereersimassagaat, taakkumi ullumikkut inuutissarsiornermik ineriartortitsisussaapput. Tamanna suliniut pitsaasoq nunatsinni suliffeqarfinnut sinaakutissanik pitsaasunik



malitseqartinneqartariaqarpoq. Assersuutigalugu neriutissaqarnanngittorujussuuvoq nunat allamiunik sulisussarsiniarnissarput taama ajornartigissappat aamma ingerlatsineq allaffissornikkut kippaarippallaamik arriippallaamillu tunngaveqarpallaassappat. Suliffeqarfinnut akisuallaaqaaq taamaasillunilu aamma inuiaqatigiinnut ullut tamarluinnaasa ukioq kaajallallugu. Suliffeqarfiit namminersortut kissaatiginerpaavaat nunaqavissunik sulisoqarnissartik, kisianni ajoraluartumik sulisartut pisariaqartinneqartut nunatsinni nammineq pigingilagut. Tamatuma saniatigut isumaqarpugut, ingerlatseqatigiiffinnut akileraarut appartinneqartariaqartoq, unammillerluarsinnaalersillugu.

- Sulineq akilersinnaajuartariaqarpoq. Tamanna aamma oqaatigaarput siullermeerinninnermi oqaratta innuttaasut pisortanit qasungasunngortinneqarsimammanerat akuerineqarsinnaanngitsoq, pivagummi inuit tunngaviumik peqqissut, suliumanngiinnartulli. Aamma tamatumani tulluassagaluarpoq 2019-mi akileraartarnermi akitsuusersuisarnermilu kiisalu inunnik isumagininnermi annertuumik ataqatigiissumillu iluarsartuussisinnaagaluarutta.

- Timersorneq innuttaasut peqqissunngortinnissaannut sakkussani pitsaanersaavoq, tamatumallu kingunerissuaa peqqinnissaqarfimmi aningaasartuutikinnerulernissaq. Tamanna tunngavigalugu Demokraatini timersorneq isigaarput tamatta siunissatsinnut aningaasaliinissatut. Qanorluunniit ukioqaraluartunut timersortitsisarnikkut piffissap ingerlanerani inuulluataarnerup nassataanik nappaatit napparsimanerlu pissutigalugu sulingitsoortarnerit ikilissavagut, tamannalu angisuumik inuiaqatigiit aningaasarsiornerannut iluaqusiissaaq. Taamaattumik timersornerup isumalluutiginnissaa maannagaaq aningaasaliiffisariaqartussaavarput aamma oqaatigilara Demokraatini pingaartikkatsigu matumani aningaasanut inatsisissami tamatumap ilaatinneqarnissaa angorusukkatsigu. Tassa imaappoq piareersimavugut timersornerup isumalluutigineqarnerunissaanut aningaasaliissalluta.

- Ilinniarneq siunissamut aqqutissaavoq, tamaattumik immikkoortup iluarsartuussiviginissaa sukkanerpaamik aallartittariaqarparput. Partiit tamarmik tamanna isumaqatigiissutigaat taamaattumik aamma nuna tamaat pillugu isumaqatigiissuteqarnissarput pisinnaasariaqarpoq.

Qulaani oqaatigeriikkakka aamma siullermeeringatta ersarissumik oqaatigaakka aamma iluarinngilara suli akuerineqarsimanngimmata. Nalunngilarput manna aappasaanerinninnerusoq aamma oqareernitsit naatsorsuutigilluinnarparput manna aningaasanut inatsisissatut siunnersuut pingajussaaniilerutsigu allaanerulluinnartumik isikkoqarumaartoq.

Eqikkarlugu imaappoq, Demokraatini aningaasanut inatsisissaq akuerissagutsigu taava takusinnaasariaqarparput akisussaassusilimmik aningaasarsiornermut politikkeqartoqartoq. Tulliatullu aamma takusinnaasariaqarparput iluarsartuussinerit aallartinneqarniartut siunertaralugu inuiaqatigiit nukittunerusumik tunngaveqalernissaat ilaatigut inunnik



isumaginninnerup, ilinniartitaanerup aningaasarsiornerullu suliniarfiginerisigut. Allatut oqaatigalugu politikkikkut namminiilivinnissap nukittuumik toqqammavilernissaa pilersittariaqarparput.

Taavalu qulartoqaqqunagu naggataatigut manna oqaatigissavarput. Kontomi pingaanermi 64.10.25-mi uuliasiornissamut immikkoortinneqartut tassanngaanniit peerneqassapput taamaakkaluartorli Inuitissarsiornermut Nukissiuteqarnermullu Naalackersuisoqarfimmut utertinneqassanngillat. Taarsiullugu sumulluunniit atorneqarsinnaasunngortinneqassapput assersuutigalugu timersornermut atorneqarsinnaasunngorlugit.

Taamatut oqaaseqarluta inassutigaarput siunnersuutip Aningaasaqarnermut Akileraartarnermullu Ataatsimiititaliami suliareqqinneqassasoq.